

VENDIM 146, datë 13.02.2020

PËR PROCEDURAT DHE KRITERET E MARRËVESHJES PËR PAGESËN ME KËSTE TË TATIMIT MBI VLERËN E SHTUAR, TË MIRATUAR PËR RIMBURSIM

Në mbështetje të nenit 100 të Kushtetutës dhe nenit 75/1, të ligjit nr. 9920, datë 19.5.2008, “Për procedurat tatimore në Republikën e Shqipërisë”, të ndryshuar, me propozimin e ministrit të Financave dhe Ekonomisë, Këshilli i Ministrave

VENDOSI:

1. Në rastet kur tatimpaguesit realizojnë investime në vlera të larta apo kanë blerje mallrash/shërbimesh me TVSH, të cilat krijojnë tepëri të lartë kreditore të TVSH-së për t’u rimbursuar, administrata tatimore kërkon nga tatimpaguesi dhe, pasi merr dakordësinë e tij me shkrim, mund të lidhë marrëveshje për pagesë me këste të shumës së miratuar për t’u rimbursuar.

2. Marrëveshja përmban planin e skeduar dhe afatet e pagesës së kësteve të TVSH-së të miratuar për t’u rimbursuar. Me nënshkrimin e marrëveshjes dhe me miratimin e planit të pagesës së shumës për t’u rimbursuar, detyrimi i administratës tatimore ndaj tatimpaguesit konsiderohet i shlyer dhe nuk aplikohen kamatëvonesat.

3. Administrata tatimore i propozon tatimpaguesit lidhjen e një marrëveshjeje për pagesën me këste të shumës së miratuar për t’u rimbursuar në rastet e mëposhtme:

a) shuma e TVSH-së për t’u rimbursuar është mbi 150.000.000 lekë;

b) nuk mund të aplikohet neni 75, “Detyrimet tatimore të paguara më tepër”, i ligjit nr. 9920, datë 19.5.2008, “Për procedurat tatimore në Republikën e Shqipërisë”, i ndryshuar.

4. Në rastet kur përmbushen kushtet sipas pikës 3 të këtij vendimi dhe pasi ka diskutuar paraprakisht me tatimpaguesin, administrata tatimore, brenda 5 ditëve pune nga data e miratimit të shumës për rimbursim, i dërgon tatimpaguesit projekt marrëveshjen për pagesën me këste të shumës për t’u rimbursuar, ku është përcaktuar plani i pagesave të kësteve sipas muajve. Plani i pagesës me këste të shumës së miratuar për t’u rimbursuar duhet të shtrihet për një periudhë jo më të gjatë se 2 vjet. Kjo procedurë mund të zbatohet edhe për stokun e kërkesave të miratuara për t’u rimbursuar para hyrjes në fuqi të këtij vendimi, duke respektuar kriteret e pikës 3 të këtij vendimi. Format i projekt marrëveshjes përcaktohet nga drejtori i Përgjithshëm i Tatimeve.

5. Tatimpaguesi shpreh dakordësinë, brenda 5 ditëve pune nga marrja e kërkesës së administratës tatimore, dhe i kthen administratës tatimore marrëveshjen e firmosur. Në rastet kur tatimpaguesi ka kundërshtime lidhur me projekt marrëveshjen apo skedulimin e afatit dhe të kësteve të pagesës së shumës për t’u rimbursuar, zgjidhja e kundërshtimit bëhet me mirëkuptim ndërmjet palëve.

6. Marrëveshja për pagesën me këste të shumës së TVSH-së së miratuar për t’u rimbursuar mund të lidhet më shumë se një herë me të njëjtin tatimpagues, nëse plotësohen kriteret e pikës 3 të këtij vendimi. Nëse brenda periudhës së vlefshmërisë së marrëveshjes së lidhur, tatimpaguesi i është miratuar për rimbursim kërkesa tjetër e radhës, palët mund të dakordësohen të rishikojnë këstet e marrëveshjes ekzistuese, duke marrë në konsideratë edhe shumën e re të miratuar për t’u rimbursuar.

7. Në rastet kur tatimpaguesi ka pranuar marrëveshjen për pagesën me këste të shumës së miratuar për rimbursim të TVSH-së dhe, më pas, kërkon nga bankat e nivelit të dytë vendosjen e shumës së miratuar për t'u rimbursuar si barrë siguroese, në kuadër të një kontrate kredie bankare:

a) ai njofton administratën tatimore për vendosjen e shumës së miratuar për t'u rimbursuar si barrë siguroese, në kuadër të një kontrate kredie bankare;

b) ai përcakton bankën e nivelit të dytë dhe numrin e llogarisë bankare ku administrata tatimore duhet të transferojë këstet e TVSH-së së miratuar për rimbursim;

c) administrata tatimore vendos në formularin “Njoftim për miratimin e rimbursimit të TVSH-së” apo në “Urdhërpagesë për rimbursim”, numrin e llogarisë bankare dhe bankën përkatëse, të deklaruar nga tatimpaguesi, ku do të kalojnë pagesat e kësteve të TVSH-së së miratuar për rimbursim, këste, të cilat transferohen nga dega e thesarit, brenda 5 ditëve pune, në llogarinë e tatimpaguesit. Në rast të mosrespektimit të afatit të pagesës së kësteve, tatimpaguesi ushtron të drejtën e mospagesës së detyrimeve të tjera tatimore, në masën e këstit të parimbursuar, ndërsa, në rastet e pagesës në avancë të ndonjë shume të parashikuar si këste të periudhave pasardhëse, shuma e paguar në avancë zbritet nga kësti i periudhës pasardhëse, për të cilën është paguar;

ç) administrata tatimore respekton afatet e pagesës së kësteve të TVSH-së së miratuar për rimbursim, të dakortësuara në marrëveshje. Ajo transferon këstet e rimbursimit sipas afateve në bankën dhe llogarinë e deklaruar nga tatimpaguesi. Për të garantuar që shuma e miratuar për t'u rimbursuar do të shërbejë si barrë siguroese për kontratën e kredisë bankare ndërmjet tatimpaguesit dhe bankës, llogaria ku transferohen pagesat e kësteve të rimbursimeve përdoret vetëm për këtë qëllim. Njëkohësisht, shumat e transferuara të rimbursimeve në këtë llogari përjashtohen nga pasuria mbi të cilën mund të vendosen masa shtrënguese të mbledhjes me forcë të detyrimeve tatimore.

8. Administrata tatimore krijon një regjistër të marrëveshjeve të lidhura, sipas kriterëve të këtij vendimi dhe informon Ministrinë e Financave dhe Ekonomisë për këto marrëveshje.

9. Ngarkohen Ministria e Financave dhe Ekonomisë dhe Drejtoria e Përgjithshme e Tatimeve për zbatimin e këtij vendimi.

Ky vendim hyn në fuqi pas botimit në Fletoren Zyrtare.

KRYEMINISTËR
Edi Rama

Botuar ne F.Zyrtare 22/2020

Dale nga shtypi 24.02.2020